



白洲集

卷

五言絕句  
六言絕句  
七言絕句

~ 16  
2388  
1



和  
2388  
1-8

白洲集叙



李學士一相求叙其先大夫白洲公  
遺集於余、以老病久謝筆研辭  
李君清益固繼之以滂曰亡以籍手  
見先人於他日也余感其言遂以疇

昔所覩記者復之公後余二十五年  
生余蚤登先相公之門見公之少也  
如神駒出水舉足千里其稍進也如  
越鰐受砥金石無堅其益進而不已  
也七襄之期於成章也洪源之達

于江海也奕、守其神采也瀟、乎  
其音調也或曰公之詩天得為多不  
但出於過庭之聞觸類而長之引而  
伸之舒而為元和長慶激而為大曆  
開元溯而為江左鄴中靡不逮也文

不主一家而規韓藻蘇溢而為駢語  
而方軌四傑一時文苑諸君無不歛  
手避讓蓋踵光相公主盟詞席中間  
指不多屈掌故氏謂 國朝無三何  
其盛哉天與高齡而盡其才其以五

到卓絕曠世不翅如今之所觀者也噫  
高凌太岳秀奪萬色造物所深忌古  
人以為恨於白洲何哉維然以公之  
業上之千古是可以少慰也噫 蒼  
交已盡公今又逝玄晏不在三都誰

託白首餘生撫卷長歎而已

崇禎丁亥孟春日石室山人金尚憲

七十八叙

白洲集卷之一

五言絕句

舟上醉書

滿載人間酒懸帆大海中長風九萬里直到廣寒宮

酒席贈琴娥

洞庭月初落孤雲歸不歸清霜深幾許看取越羅衣

瓶花

好是沙瓶裏花開特地新偏沾一勺水永負百年春

花下獨酌懷友生

踈雨乍晴後暖風初動時清香如可掬千里寄相思



戲贈朴生

半臉偏紅爛非關酒暈移還家應有問何處着臙脂

扑於酒所使氣  
被人拳搏故云

江夕

帶雨孤帆落腥風入座新呼兒催夕飯定有販鮮人

次鄰丈韻

寂寞花源裡耽看貝葉書時因載酒客知有子雲居

題畫

始謂顏如花烟霞蒙玉質終疑花似顏暗葉清香發

右烟梅

關塞三年笛江城五月花臨溪一朶影應減舊枝斜

右落梅

古槎雪盈尺葉與花同色不有清香來山蹊無處覓

右雪梅

朱箔月斜影綠窓花暗香看花比顏色對月理殘粧

右月梅

夜坐口號

缺月上林抄踈簾風滿衣多情雲外鴈日夜望南飛

卽事

月出半江白寒沙潮未落南樓一鴈過萬里秋雲薄

月夜贈影

山路獨歸人月明影為伴君應不負吾百年無聚散

聞鴈寄人

何處聞春鴈西樓月落時破君千里夢催我五言詩

送朴弟仲連漪往春川玄翁謫所

花下一樽酒東風三月三憑君問前路春色亦湘潭

西郊別席口號贈吳肅羽翻二首

別語何須遽離杯且莫催杯乾語了後無賴駐行臺

風暖日長時草深花落處離恨向誰論青山聞別語

花下待酒

影轉三竿日香飄萬點春獨尋青草路遙待白衣人

西湖趙生來訪戲書其便面二首

寄語西江柳春來拂地烟輕條如可攬繫我釣魚舡

皎皎沙邊月濛濛水際烟柴門休早閉應有子猷舡

卽事

秋花踈寂寂朝雨冷蕭蕭一枕孤眠起鑪香半已銷

渡銅雀津

九死猶今日危途歷試曾男兒須信命騎馬渡輕水

詠盆梅

雪裡花猶發春來葉尚寒豈無燈下影宜向月中看

渡金谷

暮發玉山縣曉登金谷舡  
踈鍾何處寺落月滿江天

松京酒席口號

原隰成何事徒驚髀肉消  
春風回馬首醉過索馳橋

送春日書隣丈扇

深院酒醒後晚林花落時  
韶光唯此日春漏不嫌遲

送春日乞花鄰丈

晝刻東東盡殘暉冉冉斜  
無回住春色須寄一盆花

夜渡弘濟橋

不有去時苦安有來時好  
去來無休時浮生忽已老

訪隣丈酒後口號

落花芳草逕垂柳綠苔門  
岸幘歸來晚前山日欲昏

乞竹

風雨瀟湘岸叢篁葉葉愁  
須分一枝影照我讀書樓

讀杜

山岳精應盡風雲氣不驕  
古今無此老人世太寥寥

題華人扇畫

過雨青山濕秋風蘆荻花  
孤舟落帆處合有酒人家

過君美墓

晉安尉  
柳公頓

一掬空山土三年草又生  
想君泉下意知我路傍情



寄送清香朴兄 大華

茶夢初圓後重簾睡鴨春黃雲分一穉傳與捧心人

早發尼山

夙起燒殘蠟催驅趁遠鴻官盃深不厭九十九隅風

縣前有九十九隅故云

家尊生辰言志 在完山試場時

今日斑衣會天涯獨未歸縱教生羽翼那得愜心飛

藍田驛

藍田朝日暖何處玉生烟舊跡惟殘驛長教馬不前

別席口號

橫海樓舫將秋雲映錦袍臨分含笑處看取呂虔刀

壬戌既望二首

月豈今宵異人應我輩如竇薰方作賦無使酒樽虛

月出東山是飽樽可此樓千秋留勝跡不必汎舟遊

重陽前一日戲用俚語口號

引用重陽節村醪典當來黃花太遲晚分付眼前開

春帖

日轉璇臺北天回斗柄東爐香沾滿袖飄盡九街風

雨中

政下北山雨方生東海雲沙鷗沾亦好元用羽為裙

謾興 小叙

數日病謝事寓居湫隘無以遣聊窓下有柚

松薑三盆雨中相對悠然有操筆之興為賦

三絕書之盆面仍寄谿谷求正 谿谷張公維號

碧葉盃心落清香勝劈柑今宵窓下夢風雨滿江南

鬱鬱三條老叢叢萬葉低即教千尺長應有鶴來棲

卷葉抽針細蟠根露玉寒箇中生意足餘地不須寬

醉別閔殿中宰清安

莫道淮陽薄山川勝永嘉何如栢府曉霜滿殿中靴

口號

未曉窓先白前階夜雪高酒醒仍不睡敲枕戲兒曹

書新曆寄岳君謫所

鳳闕頒新曆蠻鄉憶老臣青春九十日先卜北來辰

題僧卷

病裡三春過僧來半日閑蕭然相對睡花雨滿簾間

汝固來訪把酒口號 汝固李公植字

巷僻春無事空簾但夕暉貧家有餘瀝不醉莫先歸

口號

睡起黃鶯轉千門碧樹深雙柑斗酒興想得古人心

七佛寺次清陰韻贈六虛

曉日明禪榻秋潮撼客堂留雲與逝水何事有閑忙  
新安客舍與金行臺地粹同宿枕上口號為別  
起而識之

窓前一片月照此對床眠明日各千里相思何處舡  
八月望游朴淵書僧卷

此地今宵月吾詩寫未能青山一條咏不復笑徐凝

朴淵洞口

峽裡人烟少茅茨只一村初疑劉阮洞莫是武陵源

圓通

夜宿姑潭月朝過北聖居圓通借僧飯山日一竿餘

戲書清風洪景澤彙扇面

峽水秋如錦清風吹桂枝鴟夷還寂寞只載一西施

洪於舟中載數  
姬以往故云

題許高城啓扇

小雨茅簷濕荷香落酒杯東來雲一片雲外是蓬萊

重陽在直廬簡永安洪都尉柱元

好是黃花節樽無一滴清誰令洪駙馬用意似王弘

衙罷向寺出宰南  
陽時

白日了公移騎驢向前寺山僧拍手言太守太無事

口號

白鷺起秋風青山送暝色初隨海門飛却向官樹宿  
同營將守申

滿酌羔兒酒將軍玉帳深三虫訴不訴吾醉到橫參

簡寄畸翁鄭公弘  
渠號

細細紅毛菜團團紫口魚江鄉好風味分餉老中書

別崔上舍皖入峽訪汝固二首

草草官齋飲蕭蕭旅榻愁人情不及雨行客未曾留  
春雨夜來歇巖花紅滿枝遙知峽中會宛似曲江時

崔及汝固皆是  
司馬同榜故云

醉書宋鎮安淵扇面

雙柑一斗酒白日大途邊君爲宋榮子誰是李謫仙

復用前韻答李上舍從龍

白日照春酒班荆官道邊華陰跨驢客同是飲中仙

卽事小叙

病酒伏枕將浹旬忽聞花事爛熳強起昇往  
前礧避風張帟而坐令兒輩折花挿地繞坐  
遂爲之紅陣花下啜茶戲作一絕

病裡尋春至風流一倍加已將茶代酒誰道妓勝花

復用前韻寄汾西錦陽都  
尉號

酒戶春來減詩情病後加舞山香一曲風送滿林花

醉中呼韻

官樹夜沉沉小燈明客心殘樽對落月歸鴈海雲深

東郊觀獵

斜日照平楚晴雲生遠渚何人工畫圖盡我吟詩處

夜別姜都事

瑜姜以湖南佐幕因官事入洛而靈光倅任子瀚統亦將行是夜

皆來會

燈暈風微入壺乾酒欲添可憐今夜會迎送盡江南

題申別坐

渡

山堂七首

病起驚花落東山賞暮暉共拚松下飲還向月中歸  
煖酒收松子移床趁月華莫言春欲暮猶對滿山花

近路花先落緣溪草自春不須看月影相對已三人  
夜色雲如海春陰月似烟醉憑松下石風露不成眠  
濁酒復生飲春蔬可煮來山童應笑我不醉不曾回  
山月照山窓主人開小缸不醉不宜去相看青眼雙  
霜落石容瘦酒多盃面肥吾詩題幾首四壁有光輝

贈南聞慶鎮

積雪蘆原野層冰水洛山天寒日欲暮匹馬若為還

次南敵萬

以雄

蓬海神仙窟歸心又見秋何因隨玉鳥同卧太平樓

謝羅太常

茂松

惠竹席

蕭蕭舍風席斑斑帶雨痕瀟湘洞庭色不意落吾軒

西郊別席口號贈鄭紫元斗源朝天

白水西流急青山近夕暉年年送客處一別一沾衣

口號送羅禮安茂松

地專南國勝人擁北方佳何如三百日日日太常齋

羅有端川妓妾而且自太常除是縣故云

關王廟醉書東淮扇送遊楓岳東淮東陽都尉號

風雨東門路蒼茫欲暮天蓬萊萬千色已在此樽前

椒井二首

白雨青林落前山近夕陽年年浴椒日此地即康莊

歇馬三田渡呼船楮子村鍾聲何處寺前路欲黃昏

口號別仁川李使君士以行健

海邑閑無事魚蝦又近秋官齋終日飲須憶洛中遊

直騎省夜訪春坊上下番醉卧不起戲書二首

學士醉不起天香猶在衣悵然出門去明月隨人歸

上番卧如弓下番卧如矢可憐上下番武士非文士

汾西第口號

西日暎踈雨落花千點愁不醉不歸去春酒滿秦樓

秋日出玉灘

歇馬青林下城頭日半竿烟茶乞隣火嗽口石泉寒

別嶺南伯

萬疊鯨濤險千盤鳥嶺紆送君歌一曲此地即平途

咏滴露菜戲贈睦湯卿

大欽

滴露無根菜清香味最佳茶山饒學士滿腹又盈懷

茶山睦號醉後懷之而去故云

踏青

欲向前山去輕陰愁殺人草無青可踏酒有綠相親

永安第口號

庭草綠如苔小桃花正開秦樓無限酒斜日不知回

斗尾舟上醉贈東淮

江山自太古來往幾人豪今日相逢處千年是一遭

永安第咏盆菊聯句

壯士披金甲天孫織錦裳天章時從紅燭下吸盡滿

盃香汝固

安東羅使君萬甲農墅醉書扇面為別六首

草綠踏青後花開穀雨前朝來風水惡辛苦過江船  
山中時節晚村杏已藏鳩坐想田家樂青青麥滿疇  
軟菜收前圃纖鱗網後川芳菲無限好怙悵此離筵  
蘆笋初生日河豚欲上時江村好風味別後幾相思  
永嘉山水窟形勝冠南州刺史斑衣舞春風水暎樓

擬赴清和節輕舟泝峽行山川兩地近五馬倘來迎

舍李家別泰安李使君

志定

醉次缸字二首

窓外月如雪窓間燈對缸詩成搖五岳筆落倒三江  
燭紅頻見跋酒綠更盈缸惆悵明朝別天寒雪滿江

別保安車督郵

把酒蟾江月題詩古驛樓春花猶未落亦足繼風流

送畸翁回時次君奘韻

君奘東陽都尉字

客行日以遠別恨何時已殘樽對寂寞落日空江裡

田家曉起

夜覺綿裘冷朝看豆葉黃農人憂歲事錯認露為霜

九月十五夜

是日乃舍弟生辰而舍弟時在晉陽

一病經三月今朝始舉頭舉頭誰與語千里望南州

題畫扇二首

岳色衡巫秀江光苕雪平山鶯清客耳不減聽猿聲  
鷓鴣貼水飛舍得一魚歸弄影白沙渚刷翎青草磯

自嶺巡還原營口號

出按開東時

去國歲將暮還營春欲生誰言必歸魯自笑却望并  
月精寺贈雪清上人

玉節東行路春水未泮時誰知月精寺又對雪清師  
贈坦均上人



見渠伽葉舞聞渠海潮音老子不禁笑憐渠初地心  
贈善奇上人

莫惜春光早春深未此加定無花有雪何有雪無花  
大關嶺上

飲馬橫溪驛山空積雪寒東臨魯連海天水碧漫漫  
別許裕善室

君應有道氣我豈乏仙才海上相逢處真成許李臺  
江陵有許李臺

題端相扇  
丹穴青雲翮清湘寒玉枝貞心與秀色舒卷可隨時

別張都事仲仁南歸

洞庭見歸客瀟湘生波悲秋有宋玉憔悴近如何  
張與宋上舍民古同鄉云

中元夜坐口號

夜靜灘聲近樓高月影賒佳人抱瑤瑟一曲惜年華  
七夕鳳川橋上口號橋在原州

水豈通銀漢人疑坐玉霄佳辰當七夕無乃鵲成橋  
洪川道中示申正言詢

紅葉隨流水何時出洞門却愁生錦浪容易漏仙源  
贈雪清上人

信宿臺山雪重逢天吼菴吾詩得何益不及誦楞嚴

贈道英師

絕粒非渠好應緣有待煩一年重見客猶不免塵喧

師住楓岳  
絕粒不言

榆帖贈澄上人

蒼出白雲端燈明紅樹間前峯知有寺獨宿一僧寒

還自毗盧贈濟有上人

三入蓬萊島仙家有夙緣憐渠雙白足為我再頰肩

長安寺送申正言恂先歸

秋日長安寺仙家少別愁同來不同去吾道又滄洲

萬瀑洞贈太嚴師

不言亦不笑相看兩心照三生石上緣一別千年少

臨溪驛別鄭達源法向江陵用加減集古體

老為關外客看盡海東山此別臨溪水江陵幾日還

贈大珠上人小叙

曉起聞清磬疎星映佛燈擁衾傾白酒耽飲愧山僧

此吾於天啓甲子冬到揚州之水洛山寺贈

玉瓊師作也時當歲時飲僧臘酒醉中信筆

以書書後不復記也今者楓岳山人大珠訪

我於原州之營自袖出此詩曰偶於忠州廢

寺得一故紙於板壁塵埃之中見紙末有公  
號故持而來獻云噫今之去甲子十七年矣  
不知瓊師之西遊在何年而此詩之流轉他  
寺又閱幾番也始作於揚州而忽遇於原州  
初得者瓊師而後有者珠師此皆人事之預  
料者乎紙揉陳久墨色漫滅稍久則將不能  
辨其字畫此紙之陳久如此書此紙者安得  
不老遂易紙書以贈

申正言 恂草堂口號

何處獨無月君家黃菊邊一輿隨兩妓呼酒過前川

送清陰入瀋

一死人誰免孤誠上帝知公身公自辦不敢問前期

玉井菴

偶向禪堂睡山深午景遲松風吹木枕令我角巾欹

金子珍 南重第口號

風雨到君家雨晴山日斜今年秋色早八月已黃花

別李尚輔 景爽貳師之行

同庚三甲會異域貳師行况當寥落日何限別離情

李判書景曾亦以同庚來會故云

酒席戲贈琴兒

九歲彈琴女人間第一娥欲成他日約其柰白頭何  
兵判茅口號

兵判何知武文衡不辭詩若教糟作壘盟主定為誰

加平途中口號別楊判校萬古

風雪萬山中獨來還獨去世路苦多歧相逢又何處

夜酌題一相扇

燭跋更應盡鷄號天亦門天明酒罷後客起汝仍行

時一相以質子入藩天明即當發行故云

汝病身猶健吾衰鬢未明曾經石泉別却勝渭城行

一相曾謫渭原時送行於靈石泉寺

汝自多辛苦吾何報 聖明西關非昔日千里不留行

瓮北河以五臣入藩時

瓮北河邊柳無枝只有身可憐生意盡攀折屬誰人

野坂題一相扇野坂在渾河時一相以質子留藩中

漠漠王孫草悠悠太子河孤臣獨歸路春色為誰多

口號示直夫李公敬與字

虜地寧無酒遼河亦有魚臨溪成一醉相對故鄉如

義州外南山留別朴德雨潢醉書扇面

我能還故國子去豈無期痛飲龍灣酒時時弄翠眉

新安館先發次直夫韻

臨水亦無興對花誰共吟  
知君獨來日先我此時心  
清川舟上口號示主人

風高角聲近灘急月輪忙  
滿船皆骨肉何處是他鄉

端相自京來迎主人亦有族分

大同江書具景輝鳳瑞扇面

長慶門前路年年春草深  
朝天空有石斜日照江心

江有朝天石

迴瀾石

蘧瑗知非歲鍾儀久繫餘  
迴瀾千丈壁立馬看游魚

碧蹄示直夫

往返同千里分携隔一宵  
從今揚浦口坐待馬江潮

時直夫將歸白馬江舊居

莫惜千金散天生李白才  
吾無一錢直徒得鬢霜回

與直夫被拘時潘中各収千金許還

弘濟橋示直夫

詩到西郊畫書從北闕  
休明朝江海去白首兩扁舟

弘濟橋戲嘲君奭

東還先一月到處樂如何  
扶杖西郊日知君感淚多

北使方於華館宣勅

崇山訪李相

聖求

舟上口號

白首歸來日君恩有鑑湖還勝腐太史抵死一金無

一相草堂示諸學士二首

一雨逢槐夏微涼近麥秋病夫常早睡今夜盡情留  
夜雨溪堂宿晨寒入戶無老夫今始起庭水滿階隅

戲題荅鄰丈

昨日溪堂會還應醉吐茵今聞李太史新得竹夫人

酒席戲集  
竹批故云

題律上人軸

小院逢秋霽高梧送晚涼吟詩消半日吾却為僧忙

秋日贈元上人

滿院黃花發僧來相對眠明朝飛錫去高卧白雲邊

灣上觀獵

以貳師  
留灣時

二首

花近酒杯香水風生晚涼醉來還一笑此地是何鄉  
野草茸茸碧風旗獵獵紅千夫行矣處亦有出羣雄

與舍弟道章宿東門外為別

時舍弟方赴  
平丘驛請所

行路難如此羊腸遍九州白頭為驛卒何幸得平丘

題徐清風

貞履

家藏畫帖十首

汙汙百谷流漲作一溪白到海豈無時回旋亦可樂  
春雨暮霏霏山光濃欲滴水澗蒲葦深孤帆何處落

巖逕淨如洗層林生夕陰孤坐不知返青山聞獨吟  
冥冥山似雲淡淡雲如水明滅數家村依稀見海市  
已辭酒樓遠又過漁村晚相喚入深山明朝採藥返  
山童擎酒來新月漏雲白醉扣隔溪村主人應未宿  
徑窄不容驢鴈飛山欲暮辛苦向何村江空唯見樹  
汀草細於毛翩翩雙鴈去回看巖底村昨夜維舟處  
驢背聳肩翁吟風聲斷續非關剡荅遊定是襄陽客  
風雪暗前橋天寒來客斷微聞山後鐘坐想禪房煖

題碧紗團扇

團團月中桂朱夏葉初舒政想西河客清風爽滿裾

戲次東淮韻

時東淮有疾

二首

異床為上藥綺語亦妨禪待君長健日共賦滿林蟬  
衰疾自然久醫言未必真如何小愈戒不到獨眠人  
宿奉恩寺題太後卷首

宿霧濃如雨濛濛鎖梵宮我沾雙袖去一洒滿江風

舟上口號

極浦依依樹斜陽汎汎舟洲邊雙白鳥同我雪盈頭

題洪運判

處亮

扇面以別

乍輟明光草初分御史臺新秋湖海興翰盡錦囊回  
蘓坡金生亭示舍弟玄洲

二水三山勝孤亭四壁空留人終日雨不管石尤風  
甲申仲冬與舍弟觀獵會宿德寺

向老無多病逢場興不禁渠家定中舞卽我暮歸心  
法聖卷

始向湘潭去仍尋岳寺來老僧多舊識笑把佛前杯  
宿外院庵

萬念俱寂處一塵不生時清香與清磬聲氣兩相宜  
六言絕句

贈影

人言金粟前身自稱玉帝外臣我已滄洲玄圃君猶

紫陌紅塵

送仲連往春川

去時莫問歸期語到令人魂斷君看峽路花飛正是  
春光欲晚

馬上口號

浮世孰無此別人生長在路中來日梅花雪月去時  
楊柳春風

松京途中次金雲瑞齋韻

麥欲秀時雉離花初開處蜂喧數載長尋旅館明朝  
牢掩荆門



前溪後溪芳草南陌北陌杏花未必今辰寂寞爭如  
當日繁華

送人

小雨梧桐滴滴微風揚柳毵毵相見相離幾度此時  
此別難堪

馬上口號贈東岳李公安

樹遠人家隱隱沙平溪水涓涓青蘋綠蓑風雨依然  
西塞山前

題南陽郡壁

寒食清明過了春風裊裊花枝玄江白石烟水政是

河豚上時玄江即揚湖有小庄

次南開慶鎮韻為別

綠陰千頃萬頃黃鳥一聲兩聲主人今宵盡醉客子  
明日將行

午日槐陰滿庭使君宿酒初醒與君幾年相別一笑  
雙眼回青

別具景輝鳳瑞西行

綠水紅蓮幕府陽春白雪詞臣腸斷西郊芳草年年  
長送行人

湏岸柔柔拂馬清川垂柳藏鴉借問巫山暮雨何如

香岳烟花

俊師軸次東淮谿谷韻

密葉粧林漲綠殘花戀樹棲紅且憐簷燕如客莫問池蛙為公

客至但評碁譜身閑欲註茶經睡起微聞剝啄山僧乞句在庭

醉題松溪草堂

十數年前舊路白頭今日重來政愛黃花滿地不辭濁酒盈杯

雨中促李文來話

家在立石灘頭合稱舟村居士問君繁枕晝眠何似

披簑渡水

舟村村名

題蔚陵主人壁上

家家翠竹蒼松處處晴沙白石依然三月風光政似江南村落

贈祥老師

萬千峰前舊路十八年後重尋明日思君不見關雲嶺樹深深

八渡河

積雪堆邊鳥道孤烟起處胡家極目黃茅白草誰知

當日繁華

白洲集卷之一

白洲集卷之二

七言絕句

小桃

寒食東風春事遲  
小桃初發兩三枝  
空庭盡日無人  
見花底清香蝶自知

書懷用前韻

自笑平生見事遲  
天門誤折桂花枝  
年來牢落抽身  
計付與青山綠水知

寒食日炊烟四起

千家朱火白烟新  
死後君恩亦未真  
惆悵怨魂何處

托野燒應入介山春

次臞髯韻

臞髯今改谿谷

莫向樽前怨別離  
向來行樂已多時  
炎風朔雪皆王土  
差喜窮途有此歧

偶吟

詩能排悶詩難就  
醉欲忘憂醉不頻  
四日江湖三日病  
滿庭花柳為誰春

將入城用前韻代人朝我兼我答人

屈指城中相識少  
問君何事往來頻  
塵心已了塵緣在  
孤負名山又一春

湖上待崔聖止

有淵

偶因行樂到江邊  
徙倚危樓欲暮天  
多少風帆看盡過  
不知誰是博陵船

燈夕有懷洛中舊遊

去年今日洛橋邊  
碧樹風燈上下懸  
一卧滄江春又過  
落花啼鳥閉窓眠

即事

三月西湖十里花  
花邊楊柳邊家鳴榔去  
屢潮初上載酒歸時月  
欲斜

無題

十二樓中第一層萬年枝上九華燈星冠玉珮朝元  
路不信人間有廣陵

月夜贈人

揚柳枝頭霽月高晚涼欹枕聽風濤從君欲向江樓  
宿草露寒沾白苧袍

與持國夜泛醉還口號以寄仍示荷冠持國張維字

荷冠今改汾西

醉起蓬窓月已低草深江路露淒淒依然記得分襟  
處白竹門前綠柳堤

次東岳韻

春來三見使君書江海迢迢信不踈自笑李鷹歸計  
晚秋風何必憶鱸魚

贈李文叔并男

日日江樓醉似泥經春不到浣花溪今朝欲與故人  
去綠樹陰濃鶯亂啼

寄呈白沙先生未達而計至

對人無語涕沾裾三見羈臣病後書六月南風吹海  
立天地躍出北溟魚

贈李士致行遠

風雨長林浙漉聲大江波浪席邊明仙山咫尺駭鸞

會恍若身遊白玉京

夜坐呼韻

滿階寒草亂蛩鳴  
簾捲秋樓待月生  
山影在江江水  
白夜深風露不勝清

別姜生

秦關日暮乏黃金  
客裡鶉衣寸寸鍼  
霜刃十年猶未  
試送君多少不平心

具景輝

鳳瑞

將往報恩告別索詩

故園歸客鴈俱還  
江畔相逢楚地顏  
欲向樽前聞白  
雪文星已照俗離山

過城中

東林細雨濕青簑  
驢背催詩日已斜  
過盡長安仍獨  
去白梁西畔楚臣家

聞西報

太平天子坐明堂  
六月興師擊大荒  
一騎輕塵飛入  
塞前軍已殺左賢王

塞門靜卧江風撼屋

日斜蘆箔影瞳矓  
八月江村竟夕風  
榻下便為他世  
界不關窗外浪翻空

擬古少年行

衣沾何處花間雨酒醒君家柳下風銀鞍白馬馱紅  
妓直過長安金市東  
章臺走馬夜深還微雪踈踈撲醉顏更向新豐尋酒  
肆美人燈下整雲鬟  
城中薄暮暗塵起惡少橫行歧路間忽見佳人曳履  
去金釵奪得何時還

雪後

九月江天雪政飛喚船多少綠蓑衣朝來試踏前溪  
路忘却沙邊舊釣磯

別竹陰

趙公希  
遠號

南遷萬里過京華來路爭如去路賒早識天心區玉  
石楚山雖遠亦吾家

奉別清風君金公

權

受降城外逐臣歸九月清霜已滿衣借問隨陽無限  
鴈幾群能向故山飛

過延興府院君金公

悌男舊葬地

十四年前過此山望中飛閣出林間遺墟破礎今無  
所樵子高歌白日還

金天落日海雲間樹外寒鴉點點還試向行人問前  
路孝陵西去即青山

元日戲題

千家門巷雉毛飛  
四里歌鐘咽暮暉  
自笑壯夫今寂寞  
閉門終日羨苔歸

贈樂全

樂全今改東淮

都尉朝天白馬肥  
玉鞭金帶有光輝  
瑤池宴罷春燈亂  
分得仙香滿袖歸

公子華筵勢不孤  
水晶盤上赤麟腴  
天厨別送黃封酒  
御筆親題白玉壺

中夜悲歌望帝鄉  
楚臣三載別鷓鴣  
行長安陌上騎驢客  
不是東陽即錦陽

古意三絕贈茂叔持國

茂叔任公叔英字

荆山玉出玉人疑  
楚國君臣石視之  
異代傳為萬乘寶  
當年賴有一人知

右玉

三尺龍泉未發硎  
古城風雨蘚花青  
無人更拭華陰土  
紫氣中宵蔽斗星

右劍

燕市千金萬馬來  
虎文龍翼盡奴才  
青絲絡出雲臺駿  
曾到瑤池一日迴

右馬

附和

古來害玉惟和氏  
何事矜誇璞裡珍  
竟被狂秦求作璽  
不如藏采過千春



寶劍埋塵不喪光千秋棄擲又何妨若教見用應  
非福材美雖彰質漸傷

驥服鹽車莫自悲猶然勝得穆王騎任他振策馳  
千里吾恐疲勞不止茲

茂叔

白壁無言世莫知卞和三則古今悲從教者作梧  
臺石不損虹光照夜姿

照匣秋蓮玉轆轤染來蛟血半糝糊風胡薛燭皆  
黃土今世無人識湛盧

病驥摧殘兩耳垂昔年老骨擅權奇春郊暖日眠  
豐草夢斷天閑白玉羈

持國

東岳寄詩兼惠魚雉次其韻謝之

旅舍何曾食有魚氣含蔬筍病僧如江鱗野羽投兼  
味此日春盤也不踈

岸柳溪花春似海竹窓微雨病相如江潭把酒一為  
別明月樓中音信踈

附原韻

苦憶青蓮好兄弟春來眠食定何如江都老尹身  
多辱未賦歸田鬢益踈

東岳

簡寄東岳

水雲身世白鷗如漁釣春來活計踈江海使君還雨

露明時不問篋中書

三月廿二曉過上林苑聞杜鵑有感

三月天津聞杜鵑邵翁何事獨淒然今逢 聖代昇

平日占得農家大有年

修上人卷

山人今在白蓮山好是山深花發處猶向人間乞句  
還山花定待詩人語

敏上人卷

咫尺仙山夢裏尋竹窓風雨到西林僧來不語對床  
睡門外綠陰千丈深

即事

仗節胡為北海傍白頭辛苦笑蘇郎明時剩有安邊  
策枉斷忠臣烈士腸  
千古綱常已矣夫到今無賴管夷吾君看屈膝胡庭  
者白日揚鑣入國都

寺門小酌

雨後垂楊裊裊低暖風斜日晚鶯啼東林醉客迷歸  
路須伴山僧出虎溪

夜宿朴卓爾弘中家復用前韻

殘花泣露近窓低五月山家布穀啼滿壁圖書燈火

白洲集卷之二  
静一簾踈影落前溪  
繞屋山高日已低  
恠禽終夜盡情啼  
凉生枕簟爐烟散  
風滿前林月滿溪

效古復用前韻

羅帷不動繡簾低  
寶篆香消蠟燭啼  
手折荷花無所贈  
羨人家在若耶溪

憇柳下

渴喉焦吻欲生塵  
五月炎程戴火輪  
綠樹偏知明主意  
清陰分與路傍人  
伏日將向西湖遇雨

氣蒸天地入紅窰  
六月南山草木焦  
欹枕晚凉飛雨過  
夢登江閣聽風潮

陪家尊泛漢與鄭襄陽  
暉吳同知允謙諸老同舟

蘭橈晚傍綠蘋洲  
細雨圓沙起白鷗  
多少樓臺烟樹裏  
幾人拈筆畫仙舟

挽崔僉知

山抹微雲曲未成  
秦家女婿尚知名  
爭如自出能傳業  
寫得陽春白雪聲  
借屋南坡畫掩門  
去年今日對清樽  
無端一夜梅花

雨欲問孤山何處村

安山途中口占眎持國

滿地黃茅盡日風海山西望夕陽紅翰林物色分留

慶工部題詩工未工

余曾為工部而持國亦曾為翰林故云

龍仁寺夜話

清梵踈鐘水石間世人遙望只雲山今宵幾處懸燈話話在禪龕特地閑

菡萏亭次壁上熊 天使韻

水檻泠泠生夕涼羅幃寂寞掩殘香紅裙翠袖無消息誰記當時白馬郎

隔簾踈月送微涼入幕輕風不散香五載重逢如一夢少緣人對薄情郎

百祥樓

浮生行役幾時閑五載西關六往還最是相看無厭處百祥樓外妙香山

蘭舟落日下前灘緩舞嬌歌此別難待得月斜人散後更持紅燭上闌干

朱樓迥出白雲端三月江城水氣寒天外數峯青似深妙香春色雨中看

嘉平館逢鄭大方 世矩

分臺御史亦風流醉擁紅裙上翠樓看取龍鍾雙袖  
濕過雲行雨別時愁

別鄭僉使

忠信

還箕城

旅館悲歌各楚顏鳳城歸路雪漫山綾羅島上千條  
柳須繫蘭舟待我還

別柳行臺

汝恪

朝天御史碧麟袍自倚三韓第一豪萬里黃塵兵甲  
裏行裝惟有膝邊刀

仙槎縹緲渡銀河雲近蓬萊瑞色多白玉樓中擎紫  
誥黃金臺下振鳴珂

行行駢馬幾時還萬里山河指顧間已識清文宣帝  
里重教紫氣滿函關

燕南擊筑動悲歌行近金臺古跡多易水長城如昨  
日不知何處吊荆軻

秦時城郭漢旌旗白草黃沙鼓角悲此日分携當此  
地天涯西去又天涯

信川途中懷洪朴兩太守有感

三月河陽一縣花雨餘春色萬人家風流太守今安  
在泣向青山山日斜

儒化清名去後思石橋東畔有殘碑依然謝眺青山

色想得樓前柱笏時

安西途中

驛路春風處處花  
可憐光景政繁華  
南來北去成何事  
每到佳辰不在家

松京途中次金雲瑞霽韻

春深官路曉猶暄  
山近海門晴亦昏  
征袖乍沾金谷雨  
吟鞭將指駱峯雲

登家後小園

一年佳節屬繁華  
岸幘平林日欲斜  
莫恨關西為客久  
歸來猶及滿園花

別奏聞使黃僉知中允

銀河路接紫皇居  
四月烟花擁使車  
定遇日邊雙玉節  
須傳浴下萬金書

次崔聖止

白蘋風起水增波  
點點輕鷗下遠沙  
天外數帆看欲盡  
夕陽遙在海門多

夜坐口號

秋雨蕭蕭梧葉鳴  
小軒孤坐不勝清  
生憎絡繹啼寒夜  
織得愁人遠別情

送鄭紫元斗源卜居關東仍遊楓岳紫元臨行

白洲集卷之二  
十一  
索語立書簡尾

谷口幽樓占一區更隨仙侶入蓬壺山靈問我來何  
暮為報秋風病未蘓

重陽宿高陽官舍

山下孤村碧樹圓海門西望月如烟今年又負茱萸  
會客舍寒燈憶弟眠

龍灣道上別卞書狀三近

山店鷄號月欲低酒醒離思倍悽悽同為萬里西關  
客又送西關西復西

清江書千秋書狀扇

行趁初陽拜紫鬮馬前青蓋疾如飛橋頭暫借班荆  
話分付歸雲絆落暉

騎省夜巡戲贈酒房李太醫

金闕沉沉玉漏聲禁城歸路遠西清此行只為甕間  
飲兵部行蕪吏部行

衛班口號

旭日初昇海色開金輿徐轉栢梁臺漢庭才子如雲  
盛別有何人視草來

戲贈吳注書

香案前頭秉筆臣青雲高步不生塵爭如帶劍張弓

容書閱殘駒夜內巡

春帖

青臺新曆逼三元  
藹藹祥雲繞禁園  
簾外春光深幾許  
奏花鸚鵡已能言

哀金將軍應河歌

牛毛山下陣如雲  
烈士橫戈報聖君  
笑殺胡庭行酒客  
自稱東國上將軍

大樹悲風落日昏  
亂山何處寄英魂  
銀鞍白馬黃雲裏  
獨領神兵度塞門

深河水接鴨江灣  
塞上孤雲片片還  
看取古今征戰

地幾人生入玉門關

春帖  
居首賜弓

天溝日暖解輕冰  
梅柳爭春較孰勝  
咸道太平還有象  
上元看月占年登

次張代言韻

文石花磚暗不分  
九華燈影翳天門  
銀臺此夜饒清賞  
點染蓬山五色雲

送進香鄭書狀

寂寞仙樨玉座閑  
只今春色在人間  
茂陵疎雨燒香淚  
未必平生識聖顏



送崔點馬

西關消息近如何聞道 皇華已過河昨夜東風花  
落盡馬前春色亦無多

端午帖

居首

紫殿晨赧欲啓初趨班簪笏繞宸居中官擎出穿金  
縷內府呈回辟病書

別陳慰使

天遣仙槎過海安定教風伯靜波瀾君看薊北颺塵  
起未必人間此路難

送陳慰使書狀

橫海樓船劍色高劃開氛祲鏖風濤橈歌換盡將雞  
曲歸趁清秋拜赭袍

挽李同知

休將勞逸較升沉真是男兒報主心一醉松都千日  
酒驛村風雨古藤陰

揚湖亭舍贈樂全

傍人錯道此仙區不映江山似畫圖物色分留曾有  
待問君輸盡錦囊無

直廬西樓口號

醉卧西清百尺樓滿簾風雨敵涼秋詞臣剩有凌雲

氣笙鶴飄然過十洲

次入直諸公韻寄樂全

窓外高荷颭夕風  
雨餘濃綠妬新紅  
蓬山六月涼如水  
不信乾坤熱海中

鎮書涼玉不勝風  
輕薄飛花打案紅  
銀鑰却收青鎖靜  
下簾聲在半天中

金盤仙露滴清風  
曲硯磨砂點易紅  
好是夜深人散後  
小樓高枕月明中

鰲背三山鶴背風  
玉桃偷去幾回紅  
終知大隱金門裏  
等是巖名酒肆中

次咏盆荷韻眎持國

翠蓋亭亭亂草邊  
雨餘風定露珠圓  
誰知一勺盆中水  
涵得錢塘十里天

耀日新粧洛浦邊  
睡顏猶着枕痕圓  
何須遠向秦臺照  
自有渠家鏡裏天

逍遙亭

逍遙亭畔一逍遙  
綠樹晴波影動搖  
日落篙師相喚語  
潮頭已上鐵牛橋

瓦村

把酒江樓日已曛  
禁城烽火隔秋雲  
西風不道羈棲

遠長樂鐘聲夜夜聞

到昭陽下流同任茂叔泛舟

露洗江天月色新酒船搖曳下龍津南湖秋水詩仙  
會誰是當年姓李人

忠烈書院門樓

明月空山錦樹秋夜深風露滿高樓偏憎蜀魄當窓  
哭一度聞來一段愁

挽隣居公子

琴臺秋草日霏霏惆悵王孫更不歸白髮倚門猶有  
待路人無語只沾衣

夜坐寄別姜公獻瑜

清漏遲遲夜未央想君燃燭檢行裝明朝白鷺洲邊  
路回首青山是洛陽

赴李文叔并男酒會

古木烏棲日落時訪君非為問青旗寒花一朵香猶  
在昨夜狂風未盡吹

關山月三絕送端川奇使君協

關山月出戍樓寒青海孤城夜角殘南鴈盡時勞遠  
夢北辰低處望長安

盤雲百八路如絲天府金城大海涯北地使君西道

主可憐榮落任明時奇公曾經海西伯故云  
端州北望是瓊州古蹟茫茫落日愁夢裏山川依舊  
否德陽遺稿至今留

次題江亭

別浦收綸帶月歸柳塘花塢影依依黃塵九陌深如  
許千仞岡頭獨振衣

酒席口號贈石門李丈景稷

國士閑居鬢欲凋酒間豪氣未全消春來掛得如雲  
席直破滄溟萬里潮

壬戌孟冬發完山體使石樓公與府尹送于龍

巖川上臨別口號石樓李公慶全號

落葉蕭蕭逐馬蹄暮山斜日下前溪寒禽自是無情  
物故向離筵款款啼

附次韻

野草輕塵浥去蹄小橋西畔是鳴溪如何盡日勞  
勞處不見芳菲掩袖啼

石樓

曉發參禮驛村燈下口占寄呈石樓

浙浙山風曉撼門酒醒身在驛西村生憎席下寒溪  
響斷盡前秋已斷魂前秋與石樓別於長淮川上是日語及故云

江南佳麗最全州千里隨公十日留臨別無人啼掩

白洲集卷之二  
袖爲誰魂夢繞東樓

石樓方寓  
全州東軒

恩津道中

鷄龍山色馬前來百里橫盤亦壯哉何似終南天半  
起萬年佳氣擁崔嵬

題石城縣

夾路秋虫卒卒鳴石陽斜日鴈南征今宵定宿巖頭  
寺半月城邊看月生

池邊楊柳柳邊家十里香風萬朶花惆悵芳菲易消  
歇獨留叢竹占年華

白馬江示李仲深穆

日出前江曉色分宿雲沙際有餘痕荻花叢裡孤檣  
立不是漁村是酒村  
何處高臺何處樓暮山千疊水西流龍亡花落他時  
事謾有浮生不盡愁  
九秋為客滯江潭癸盡征南幕裡衫千里歸來佳節  
過晚楓飄盡落花巖

口號

何事啼鴻夜半過蘆花深處月明多山長水遠莫飛  
去未必江南無網羅

柳堤村庄贈主人

無限城西十里餘，柳堤斜日到君居。  
郵人且莫催歸路，擬向前溪夜刺魚。

十月十五日夜獨坐溫陽郵舍

是日蘇仙赤壁遊，至今千載想風流。  
如何幕府三年客，獨坐郵亭對月愁。

驢背口號

驢背新詩雪裡成，還如歇後灞橋行。  
從知便面都無賴，又被街兒喚舊名。

夜坐口號奉洪兄

坐睡茅簷月欲斜，強排詩句答春華。  
王弘故事無人

會且典輕衫向酒家

僧卷次五峯韻

五峯李公好閱號

村巷寥寥無子來，小爐香篆對清煤。  
逢僧半日空門話，卧聽春天起處雷。

次南郭咏茱萸韻

南郭朴公東說號

好是城南熟食朝，滿簾風雨坐寥寥。  
書牆已卜移花日，莫惜茱萸借一條。

題壺面上岳君

江村夜雨濕黃梅，山下柴扉晚不開。  
惆悵一壺容易盡，可能留待主人來。

鷺江赴約虛還

少年豪氣未全消  
江海清遊不待招  
免使街兒齊拍手  
共携殘月過船橋  
前宵一雨政迎梅  
多少樓臺面水開  
白馬翩翩何處客  
夕陽揮手喚船來

戲贈東陽鄭使君

三月東陽夾路花  
橋頭立馬帽簷斜  
紅裙緩步綠楊下  
莫是錢塘蘇小家

贈鄭上舍

酒醒孤館夜淒淒  
風滿疎簾蠟燭啼  
惆悵客中佳節

過杏花飄盡月輪低

碧蹄館次尹白沙韻

梅花飄盡柳眉舒  
斜日長郊跨尺驢  
莫喚蠻童舊學士  
年來焚却碧山魚

泛赤壁次席上韻

蘇子千年莫擅奇  
江山不為古今移  
風流我輩差無愧  
只恨當筵下筆遲

挽李內乘小室

落花飛絮兩無情  
一夜檀郎素髮生  
燕子樓空春寂寂  
更無人唱雪兒聲

寄司甕李奉事鳳龍求磁杯

瓢樽太朴玉杯奢最愛陶沙勝雪華  
解道春來添渴病免教花下掬流霞

酒席口號贈人

隔簾微雨送微凉青眼相逢故意長  
合有深杯澆阮籍可無佳句慰潘郎

座上有請悼亡詩者

登駱山次趙正璞韻

移席山頭石面平滿衣風露夜凄清  
秋來一樣松間月似為吾曹分外明

寄呈登極上使吳知事允謙

海門秋日照仙袍回望青徐黛色高  
為問歸來更何狀

聖朝方欲記前勞

別海西柳節度孝傑

西關佳麗最黃岡秋日樓臺菡萏香  
想得總戎心獨苦柳營元是舊桐鄉

休誇一日長乎余未必書生劍術疎  
多病十年餘勇盡但將文字作儲胥

次五峯韻題三角山僧法正卷

東林秋賞待清霜楓欲酣時菊正香  
會待小山招我去醉題佳句滿禪房



友人酒席次座中韻

前宵一雨滿城花花底開樽到日斜莫道芳醪容易  
盡春衫已付酒人家

自西關初還口號題枕下

梅花杏花俱無情惟有碧桃留待我欲箋天公乞春  
華日日痛飲花樹下

醉題崔大容有海小家

酒如澠處即佳期君欲眠時已夕暉但使如花人薦  
枕莫言浮世有生離時大容將赴關西

酒席次鶴谷書示韻鶴谷洪公瑞鳳號

不道月斜客欲散秋花照影成三人對我飲者即我  
友問誰為偽誰為真

挽南懷仁鎮子世薰

何處青山何處村柳車秋色返孤魂傷心落日寒泉  
路不見星翁更倚門何處村名

挽金生內

白幅重封外面題看來一字一含悽清秋換盡潘生  
鬢捻為孤鸞子夜啼

南郭發引口占

城南風雨早鷄鳴引路秋燈點點明惆悵此生唯此

別只應相送不相迎

挽人

官樹沉沉月欲低  
白衣携酒驛村西  
誰知此語爲詩料  
賦得哀辭拭淚題

次題高峯僧卷

醉睡林齋渴夢長  
一甌新茗敵仙漿  
逢僧喚起題詩興  
海雨山雲滿卷涼

對酒次鶴谷

以酒爲名何忍斷  
婦言枉了劉家翁  
貧家涓滴未全薄  
亦足一洗磊砢胸

寄別畸老還鄉小叙

昨借東家驢擬別  
畸老於江上中道  
被荷寇公強酒仍  
倒載以還醒來皎  
然而悔者皆醉時  
所料也隣雞四號  
曙色將至想公燈  
下俶裝時也東家  
驢既難再借而西  
湖十里路又乏長  
房之術何由把一  
杯相屬而別耶歲  
將暮矣離思倍苦  
東山自是少情人  
何但作數日惡也  
枕上率爾有得或  
是實際語遂擁衾  
呼火而書之

夢裡依然似有期  
覺來離思倍悽其  
多情一片江頭

月能使行人住少時

高丈善行投橘贈詩未開封清香滿袖讀未終  
牙頰生香詩能香橘耶橘能香詩耶詩以謝  
之

千里題封拆手忙袖間沾得洞庭霜君詩自有天葩  
艷錯道華牋染橘香

書簡尾寄南平倅

梨花羞白杏羞丹秋後江城晚菊殘若得千砧三色  
紙佇看香露落毫端

書簡尾寄河陽倅

潘岳當時滿縣栽至今黃白紫交開煩君奪取三花  
色染得新牋寄我來

送咸鏡朴都事

咸關嶺外海茫茫一望家鄉兩鬢霜驛路黃花秋正  
晚不知何處作重陽

送閔評事

幕府青衫敗葉如塞門歸路鴈飛初燕然事業輝千  
古班掾當時是掌書

迎祥  
屏首

午門殘漏趁班初沾得宮壺拜及餘舊俗共傳荆楚

白洲集卷之三  
記新符爭進後除書

白鷺洲別睦御史叙欽向北關

癸亥 反正月初  
御史赴闕

東鐵關南北嶺西東馬首山川大略同共說歸期花落  
後不堪離思水聲中

玉燈道中

夾路飛花點客衣水聲嗚咽怨斜暉明朝早向和川  
縣穩着青鞋上翠微

金城客館

看盡西南峽裏花驛樓欹枕日初斜青鞋布襪渾無

恙更踏蓬山五彩霞

和川路上聞行客出口號

和川細路入蓬萊擬趁巖花爛熳開想得山中春事  
晚此翁今已下山來

淮陽客館

行近蓬山意轉忙儗裝初夜待晨光從來錯道春宵  
短似為吾行一倍長

水聲如送又如迎關樹沉沉蜀魄鳴四面雲山千萬  
壘不知何處望秦京

顯佛菴

辛茗靈源洞裡來  
劔峯千疊水千回  
寒敲澗石生新  
火煮得松醪飲一杯

大松蘿贈妙真

四月蓬山雪未消  
萬千峯色玉岩堯  
高僧住在最深  
處不信人間花已凋

古寺

何郡僧歸何郡山  
獨留風鐸響簷間  
落花深院無人  
見惟有閑雲自往還

普德窟

鐵鎖高垂百丈餘  
石門深掩一僧居  
青毛公子有時

過仙樂泠泠生碧虛

普德菴中絕粒僧  
紙囊松葉貯三升  
前峯月出後峯  
雨巖上花開巖下水

萬瀑洞

蓬萊元化洞天西  
青鶴何時返故棲  
今夜月明人靜  
後試聞窓外戛然啼

天德庵書贈懷賢上人

孤夢初回五夜鐘  
宿雲如雨淡還濃  
不知身在蓬山  
裏却問蓬山路幾重

臨別贈法堅上人

白洲集卷之三

三二

白洲集卷之二  
二十  
欲上肩輿故遲逝雲流水杳前期洞天斜日獨歸  
去誰道仙家無別離

摩訶衍贈尚玄上人

師在摩訶近十年不曾持鉢出山前三時拜佛無餘  
事桂樹清風抱膝眠

戲簡楊飛來萬古

白洲居士自蓬萊今日翩然下石臺築室遺蹤無問  
處飛來何不早飛來

贈榆岵僧珪安

萬二千峯百八寺每逢僧卷不曾辭如何到此山窮

處又見沙彌來乞詩

贈雲水菴祥老師

腹裡千箱釋氏書幾年雲水絕居居門前常滿四方  
屨莫是世緣猶未除

贈靈雲

看盡金剛內外山鑑湖歸路入花間芙蓉秀色猶回  
首故遣藍輿緩步還

贈惟正

清都露氣濕晨鐘夢罷瓊樓第幾重看取落花漂水  
過世間來去本無蹤

白洲集卷之二  
題洛山僧義正詩卷

梨花飄盡綠陰濃  
客到沙門聽暮鐘  
會待水輪生碧海  
夜深移席最高峯

別齊已

十載雲霞幾夢思  
客中相見奈相離  
秋來更着尋山屐  
直到崇陽問舊師

題鑑湖草堂

鳴沙細雨濕棠花  
並馬春風到習家  
看取繡衣扶醉去  
小橋南畔帽簷斜

贈洛山僧

碧海紅濤撼客床  
卧看初日湧扶桑  
三山此去無多路  
脚底金橋萬里長

峴山道中

峴首飛花入馬蹄  
滿城歌舞舊銅鞮  
平生願踏關東路  
今日關東却在西

竹西樓寄別奏請上使李知樞慶全

東來無復問行期  
使節何時拜玉墀  
此去漢陽千里遠  
漢陽西去又天涯

別副使尹同樞安國

真珠城畔舊名樓  
五十川涵太白流  
西海定如東海

潤想君行李為君愁

昭陽亭謝巡使

珍重佳人錦字書為君臨別幾躊躇春城萬柳渾無  
賴不見長條繫別裾

原州酒席口號

分司御史自風情到處狂言滿座驚爭似此行王事  
惡不遑留問紫雲名州有歌妓而下  
在席上故云

挽金子瑞廷興府院  
君之兩子昆季

淺土荒山白露新向來香火屬何人纔看寶座臨黃  
道已見珠襦出紫宸

弱冠交義我惟君詞賦當時已出羣十一年前日  
作篋中猶有舊香聞

蘭摧玉折兩無端五月燕霜特地寒秋水形容長入  
夢覺來衣袖不曾乾

孝陵西畔有青山破礎遺墟落照間此是行人嗚咽  
處可堪重送柳車還

挽吳翰林希道

江路沉沉炬明曉風淒斷柳草聲人間此別無回  
日淚入南雲不作晴

罷官時以銓  
命罷

原州集卷之三

三



倦馬長堤趁早衙禁林初日散棲鴉非關誤了尚書  
約莫道眠他賣酒家

送順天李使君德米

白梅青竹間黃柑花縣潘輿樂事酣不是承明勞侍  
從君恩欲試小江南

簡謝永安送雉

五月胡鷹不下韉草深山路獵夫休誰將彩羽周人  
惡方信君家百不憂

別沔川申使君敏一

公退携琴伴月樓使君清興滿滄洲爭如破帽黃塵

裏鎮日趨衙不輟休

挽李將軍重老

漢家三十六將軍幾箇捐軀報聖君腸斷歧灘鳴  
咽水不堪回望別時雲

竹陰第與汝固同賦

小村花事向闌珊數點歸鴉落照間為問殘尊深幾  
許待着新月上前山

西清玉漏報珊珊萬戶春燈素靄間醉着花前迷去  
路夢中人對畫中山

蔣中興寺次題僧卷

吹笛山樓霽月來洞天寥濶興難裁至今春色無多在莫向尊前奏落梅  
曾踏金剛內外山馬前吹笛入長安今來洞壑渾相似且為身閑盡意看  
常恨漁舟入洞府為誰容易返人間今來客是曾來客已見山如未見山  
落花流水洞門香繫馬松根已夕陽深院點燈僧語靜滿山烟月夜蒼蒼  
黃梅一雨過清明洞裏輕陰不放晴花落武陵春寂寂水聲如送又如迎

端午帖

居首

日高紅繖影徐迴香散金爐寶殿開多少詞臣爭獻賦就中誰是子雲才

次僧卷

居士幽居遠市朝小爐終日對焚椒僧來共指蓬山路天外殘霞點點消

題三角寺僧卷

老僧辛苦下山來乞得新詩日暮迴何似蒲團成穩睡灑然無夢到塵埃

挽申揚州

景植

漢臣官序自雲臺勲業終非百里才不道平生熟  
面愴心偏為却方回

別興海洪使君寶

一帶鳴沙碧海頭月松南去望京樓要知御史曾  
行跡為向崇州問白鷗

書舍弟詩後次其韻

卯君詩格十分高弱歲承恩近赭袍讀破內藏千  
萬卷佇看江海入揮毫

自應教移拜中書汝固作詩妬之次其韻謝之  
冰條猶帶編修官漫客華街轉不安偶被花羣勾引

去醉來無夢到金鑾

寄茯苓谿谷

雪白金堅鳥獸形幾年松下秘真精題封寄與揚貞  
外共待丹成上玉京

書堂別席醉書嶺南伯李子時扇面子時李公  
敏求字

落花流絮點人衣三月江村燕子飛惆悵孤舟南岸  
別不堪空帶夕陽歸

次子時韻為別

花飛江路雨絲絲南浦悲歌怨別離為報行人休早  
發共携殘酒月明時

送蔡書狀 裕後

昔年飛傳過宣城西望孤山落照明此是故人浮海  
路想來那得不沾纓

泰山如黛近烏檣萬里風烟繞筆芒想到齊州爭拭  
目蔡中郎是壯元郎

贈水洛山人休靜

軟飯山家細菜新老僧生理莫言貧回頭落日陽關  
路何限人間羨爾人

戲作

十字街頭一字廬竹簾三葉補前虛休言近市盤飧

羨臨水猶無自現魚

龍仁客館 以安胎使  
赴湖南時

山館停驂日欲斜小庭新綠淨年華無端一陣東來  
雨半為開花半落花

近水樓臺特地清小村籬落午鷄鳴遙看草際披簑  
女擬趁南陂餉晚耕

振威道中

夜來風雨滿江南春色留殘十二三尚有餘紅披艷  
艷漸看新綠映毵毵

礪山東軒

客心凄切不成眠  
窗外梨花有杜鵑  
啼到五更聲轉  
苦曉山如夢月如烟

書長城妓秋香詩帖

南來爭唱滿庭芳  
無奈殘紅過眼忙  
獨有桂英雲外  
發九秋霜後轉多香

香嶺外老娼  
桂英其字也

光山遇高君涉

傳川

軟草飛花欲暮春  
馬前光景逐時新  
纔從洛浦逢神  
女又向瀟湘見故人

到金陵奉呈岳君

三年重對楚臣顏  
說盡悲歡到夜闌  
海上春山無限

碧但教籬外別人看

又呈一絕留別

來日先愁去日難  
異鄉歌吹不成歡  
平生制淚渾無  
賴衣袖今行自不乾

簡謝咸平倅朴大觀

証

霜落青楓鴈叫群  
故人消息隔南雲  
多情一片湘潭  
月來照窓前宛是君

竹田觀獵

薄薄春水溢馬蹄  
夕陽移獵竹田西  
山頭飯熟催行  
炙一抹青烟傍小溪

秋夜對黃花口號寄趙梨園

璞

竹床蘆箔夜燈深  
花下芳樽淺淺斟  
想得故人清不寐  
閉門紅葉短長吟

病中次樂全寄示韻

閉門羸病淡旬遲  
春思闌珊不到詩  
昨夜枕邊聞過雨  
小桃應發向南枝

夜直騎省聞金吏部與玉堂兩學士同會銀臺

病未赴邀詩以謝之

天郎夜宿右銀臺  
玉署群仙並步來  
獨有西曹病司馬  
滿窓花月夢初回

復用前韻謝兩學士來訪

夜深環珮集仙臺  
移向西曹步月來  
未必明朝封事在  
不關窗外斗杓回

直廬夜雨憶東巖草堂

小雨廉纖不作聲  
直廬人靜夜淒清  
悠然想得東巖路  
烟樹沉沉松火明

直廬口號

日斜宮樹影瞳矓  
拍拍簾旌響夕風  
銀鑰已收清漏下  
直廬深處小燈紅

是夜三學士見臨

宮漏沉沉月半規侍臣聯步下瑤墀蕭然閉戶懸燈  
坐宛似禪房入定時

小塘頽落不成規分蘸東西數尺墀待得新荷高出  
水坐看涼露瀉珠時

午渴澆書日作規醉看花霧暗前墀忽驚萬點鮫人  
淚錯落詞臣運筆時

別吳肅羽口號

病裏拋書盡日眠為君拈筆染華牋兩家他日成遺  
稿半是西南送別篇

別春川府伯柳公

舜翼

春城都護舊監司曾攬清平水石竒莫道此行榮悴  
異少卿勲業屬明時  
官郊獵罷擁肩輿江路燈明夜刺魚穩睡鈴齋慵不  
起案頭惟有道僧書  
四月垂楊拂釣磯夕陽歌吹放船歸當時勝跡無人  
記試向沙鷗問繡衣

天中日小軒口號

小軒孤坐愜幽期山近疎簾水映籬滿眼游絲晴晝  
永樹陰涼處睡鷄兒

壘燕窠蜂各趁期掠花沾水巧通籬香蒲裙帶此村

白洲集卷之二  
女碧樹鞦韆何處兒

直廬無事飯後不禁春睡望見兄家後園綠樹

參差黃鳥睨眈悠然有棋酒之興為賦一絕

求正白洲奉谿谷

微微風緒午陰涼倦卧拋書睡味長想得南軒棋罷  
後隔林鶯語攪詩腸

口號

栗葉巖巢梅子熟山居白日偃荆門無情布穀還多  
事纔喚東村又北村

白洲集卷之二

白洲集卷之三

七言絕句

送清陰朝天

赤雲如火欲燒空羽扇冰漿未策切何限關河何限  
苦晴塵千尺晝濛濛

督府旌旗海上多漢臣消息杳銀河鯨鯢出沒渾閑  
事白日樓船倚劔歌

銀臺金闕望如雲玄圃滄洲路不分借得仙人雙鳥  
去隨風直拜玉宸君

蓬萊閣上望蓬萊落日明霞蜃市開一片殘碑堪共



語千秋重見謫仙才

臺端獨立映冰壺進退何曾素節孤自信 聖明容

直道敢論衰病倦長途

少年持節日南鄉一瞥風帆破渺茫自有神明扶護  
力即今遼海亦康莊

文章獨步漢西京曾擅紅蓮幕裏名天上仙班多舊  
識玉河環珮定相迎

處世曾無一日安報 君確有寸心丹分明夢裏經  
行路謾說人間此別難

謝山人餽石笥

嘉蔬生在最高臺多荷沙門採採來此是山中好風  
味絕勝相對煮青梅

書北窓

長簾踈簾五月涼北風微雨灑虛堂仙經一帙恒留  
案此是閑人却睡方

高枕夢回初啜茗小窓棋罷更燒香最憐西塢梧桐  
樹不礙涼風礙夕陽

騎省直廬次銀臺韻

舊跡重尋六載前素餐長愧水衡錢何時借得東歸  
夢送老烟江水石邊

嬌鶯相喚綠楊枝  
蘆箔輕風晚景移  
三日長番無一事  
案頭時檢故人詩

長憶薰葭倚玉時  
退才猶復免逋詩  
如今離索仍多病  
舊筆拈來手自遲

夜渡歧灘

以承旨赴灣時

夜渡歧灘月欲殘  
水聲幽咽露華寒  
千年怨碧原頭血  
化作秋螢點點看

次金去非

地粹韻

關月蒼茫隴水流  
宛然風物古涼州  
可憐客舍窓前菊  
也是行人去後秋

發新安日清陰以行資辦酒出城西五里外臨

溪作別過飲晚發到林畔夜已三鼓矣口號

一絕奉呈清陰

風雨淒淒雞亂鳴  
客窓孤燭到天明  
河梁咫尺成千里  
何況它時隔海情

附次韻

孤館虛簷夜雨鳴  
獨留燈火伴人明  
明朝來又作龍灣  
別海上秋風一倍情

清陰

車輦館雨中書贈鄭子容情娘

子容鄭公弘溟字

銅山羨女王為名  
曾侍天郎儂幕行  
泣說當時衾裏

白州集卷之三  
語一封書寄萬重情

龍灣歌

將軍出獵鎮江北十里平郊春草多落日歸來齊放  
馬千人拍舞萬人歌  
遼陽少婦顏如花月下彈箏沽酒家白馬翩翩何處  
客金鈿奪去向人誇  
九連城接鳳凰城寶馬香車夾路行惆悵百年全盛  
地祇今秋草鬼燈明  
處處胡笳月下樓塞天寥濶鴈來秋山川最是無情  
物自在青青自在流

統軍亭習陣戲贈灣尹

山河百里壯儲胥飛將聲名結髮初黃霧滿城迷咫尺請君先試指南車

登龍骨山望西洋寄清陰

此為蛇浦此車牛薪島西邊未辨洲今夜使船何處泊夕陽回首不勝愁

小蓬壺書贈日娘

八月西風白露寒滿庭紅綠已摧殘葵花一朵香猶在想得仙郎帶笑著

圓通

滿山紅盞政酣霜  
早飯雲興木耳香  
好是一年今夜  
月不妨携酒遠公房

別龍宮洪使君靈

風雨淒淒雞亂鳴  
離懷悄悄對寒檠  
朝來擬作河橋  
別為問行人行未行

別安邊使君

城頭日出早鴉啼  
官路迢迢送馬蹄  
行到鐵關回首  
望長安遙在夕陽西

獨坐出率南陽時

黃昏封印對前山  
官樹沉沉宿鳥還  
自笑使君為政

拙下車三日訟庭閑

水涯

掃牒公齋日未斜  
舍輿乘馬出平沙  
官童解事還多  
事爭把漁竿走水涯

果川道中

歇馬高原縱目初  
暮山斜日一竿餘  
旁人不識征夫  
倦錯道臨溪看打魚

席上贈辛堂后應望

近侍辭朝帝傳初  
使君臨水夕餐餘  
行厨小酌無它  
味草草盤中箇箇魚

椒井

秋江水落露魚槎江上初開木  
麥花政是椒泉沐浴節萬人張幕白如沙

路上贈遼僧叔姪

孤影伶俜萬里携阿咸同去寄招提  
可憐華表雙飛鶴世亂何時返舊棲

陽川

園林初訝仲長園村落依稀輞口村  
只為東南官道近有時車馬往來喧

送汾西還京

永夜江城鼓角寒平明送客入長安  
長安親友如相問為說平原十日歡

七月

七月江城紫蟹肥軟炊香稻雪霏霏  
爭如待漏銀臺日嚼得黃蘗減帶圍

風雨

風一番休雨一番海天陰翳晝常昏  
堤防盡沒禾生耳不忍催科近水村

海倉收租

太守騎驢到海邊村人指說老生貧  
無端一陣松前

鳴驚起波間白鳥眠

川上小酌

官橋候火照前山每向溪頭盡醉還自是邑人知我  
懶不關無事訟庭閑

與水原府伯李公

時白

觀獵觀海亦會

觀海李公敏求

號

風雨蕭蕭江海寒將軍躍馬萬人看南山獵罷田間

飲何似平原十日歡

纔與汾西會飲郡齋

南陽郡齋檢書得故友任踈菴茂叔所寄詩草

感而有賦奉谿谷和之

踈菴任公叔英號

清詩零落在塵埃散帙今朝眼忽開卷裏光陰磨不  
盡玉樓高處幾時迴

附和

高才陵替只堪悲每憶踈翁翫髯姿唯有故人同

此恨篋中搜得十年詩

谿谷

宿汾西第邀子容

主家新釀夜初熟湖海使君明日還為報滎陽須早  
會曉窓棋局待君閑

夜坐戲次兒輩韻

十里官街霽月明風光不減洛陽城依然夾路揚鞭

去苑似旗亭載酒行

簡寄澤堂

李公植號

昨夜分明夢李白今朝有客自忠州槎頭縮項今應飽撥下團臍更不求

書簡尾寄澤堂

峽田生理問何如消息春來倍覺踈想得茅齋烟雨裏松明依舊照殘書

醉中呼韻

三月江城花落時故人持酒若前期一春風景無多日別後看花有所思

生朝

花滿江城霽色遲故人逢處即佳期冰輪二八清明節金粟如來現相時

老妓携琴適至

少日風流擅教坊白頭飄轉寄它鄉瑤絃玉柱皆零落獨向殘花淚萬行

歸來

紅杏花邊白竹扉水禽相喚近人飛明沙翠壁漁樵路獵罷歸來已夕暉

大風訪尹上舍

落花飛絮共閑愁，載酒春風到海頭。却笑行窩四不出，一生能得幾回遊。行窩一作老夫  
相逢不飲奈春何，寒食清明次第過。為報東風莫相妬，一年花事本無多。

謝洪益山贈仙果

滿筐仙果露華新，玉液偏宜病渴人。想得山家閑日月，世間元有別般春。

金川橋上別汾西兄弟

江雨初晴水半篙，漏雲紅日照征袍。今宵借宿沙橋院，回望青山幾疊高。

永保亭十絕寄宋節度

英望

海上孤城城上譙，城門吐納去來潮。城中鼓角將軍令，城外帆檣估客謠。  
海雨來時汀草腥，海烟到盡遠山青。中天鯨浪層層雪，極浦漁燈點點星。  
水南城北竹千竿，石室金函土一壇。壇下時時龍馬出，風雷白日滿江寒。  
內浦形勝兩湖最，水營城西天下稀。大扁小扁販鮮去，迎神送神扶醉歸。  
萬里金波落景低，十洲三島望參差。秦童採藥非他



路星漢通槎只暫時

壬癸年間亂離際天將之舩來泊時聽說中原無此  
勝岳陽黃鶴謾稱奇

將軍意氣萬人豪功業雲臺映彩毫揚僕樓舩天下  
壯馬援銅柱日南高

轅門令肅百無違魚鳥猶應聽指揮壕粘醜石却成  
壘鷺晒平沙仍作圍

天近高樓玉帳開詩成橫槊羽觴催鼉鳴庭下朝衙  
散火照城頭夜獵回

一宿三清月滿空至今衣袖有冷風眼前對景不能

道追憶成詩那得工

謝逢川崔公鳴吉號

一枰相對幾成虧庭院寥寥午景遲忽憶廬山白鶴  
觀古松流水閉門時

送客柴門日已斜獨留棋局向殘花床頭萬卷渾無  
賴病眼春來似隔紗

箭郊

平楚微茫落景斜望中烟樹幾漁家溪風滿袖消殘  
醉放馬東門十里沙

公州村舍贈主倅

四月村村打麥聲行人飲馬錦官城風流地主來相  
送淹却江南半日程

惟敬軸

萬曆戊子間家大人自鰲山入瀛洲遊賞十  
餘日時則有印悟老禪師一見知非為俗僧  
聽其言問其平生蓋不平於世者也不佞寤  
寐茲山數十年崇禎己巳夏拜舅氏於扶風  
仍歷內外山寺悟師已西遊而詩卷則藏之  
舊龕沙門惟敬持鉢出山亦纔數日矣讀其  
詩思其人不勝李頎物在人亡之感遂成一

絕書諸卷末

寺門松影晝參差客到嵩陽問舊師惆悵山人苦心  
處世間零落幾篇詩

早行

海日韜霞不放晴板橋霜滑斷人行鳥鷺自是安棲  
鳥移向前溪軋軋鳴

簡隣丈

滿園濃綠間殘花日午游蜂懶趁衙想得閑居同一  
興藥爐茶臼似山家

次謝鄰丈惠來禽詩韻

年來脾病睡為魔不但文園抱渴多佳實久聞青李  
帖一筐新自藥翁家

藥翁其  
號也

訪村隱不遇

老人劉  
希慶

山下孤村白日閑隔籬溪水送潺湲松陰滿地無人  
見坐待劉郎採藥還

次南漢僧戒淨軸

雲際微尖隔水山小軒長對畫圖間山僧偶自山中  
至却說山中無此閑

次慧遠軸

曾向東林訪遠師至今猶記寺門詩長安六月塵如

海師自山中幾日離

簡謝咸平安使君

獻徵

一尺烟筒百鍊金題封千里故人心中通外直堅如  
許不用東臯萬竹林

簡靈巖倅李東野

炯

幽居地近上東門五馬歸時此路喧昨日未應辭北  
闕滿城風雨宿何村

別靈巖倅李東野

小叙

四月間送端川李丈出松溪上班荆呼酒而  
別曾未數箇月又送阿咸公朗山之行是何

自注卷之三  
一年之內南北千里之別偏在此一家也况  
春府老先生為完民所借留不在乎 朝已  
踰年矣不勝前後別離之感臨溪索筆而書  
之

野橋流水細環彎村落依稀夕照間  
怙悵一年今再到路人應指打魚閑

別鄭殿中雲翰出宰安陰

臺栢沉沉未散鴉殿中聯騎已趨衙  
秋花錦石江南路今日爭迎太守車

西郊餞洪兄雲迎慰之行與樂全汾西醉後呼

韻

征馬蕭蕭夾路鳴水清沙白夕陽明  
酒醒何處得佳句極目前郊芳草生

泱泱溪橋暗水鳴雨餘風日愛清明  
休言少別輕千里一夜相思白髮生

道聖庵贈乞詩諸僧

風雪呼鷹過別村夜深携酒入沙門  
山人乞句真多事病我年來學不言

次東岳韻

已看珍錯勝雙魚更有新詩荷眷殊  
元白傳筒真不

分穢形惟媿在傍珠  
請郡二年守海鄉更隨鷓鴣入開陽惟思薦補酬恩  
地不管推擠已備嘗

附原韻

侍郎三十賜緋魚再拜天官位望殊  
聖渥即今期報答肯教滄海有遺珠

梁肉如山醉作鄉東銓豈復憶南陽只應海胃名  
堪愛舊味登盤合一嘗

東岳

箕城公子園林口號

名園佳會趁清秋公子華筵揔勝流松影滿庭銀燭

爛更携明月下西樓

政廳夜吟奉朴承宣

弘義

微雪踈踈翳月光九門如海漏籌忙侍臣自有煎茶  
興夜半題詩政事堂

詞臣起草入明光磚路沉沉曳履忙應笑不眠醒吏  
部破帷殘燭坐虛堂

次朴承宣韻

病臣家在洛東城歸路應聞五鼓聲霜雪滿韉君莫  
厭幾年江海憶春明

戲贈分沙

李公聖  
求號

日日僮奴與疊騎新年羸馬益成疲從今欲避竹前路媿殺街頭輕薄兒

竹前街名

次徐負外

挺然韻是日宣醞

蓬萊宮闕五雲高玉椀交梨出內曹堪笑漢臣空抱渴可憐方朔謾偷桃

賞梅永安家次洪景澤

糞韻

艷艷花開嫋嫋枝素娥脂粉雪膚肌君家自有歲春塢不管東風盡日吹

漢江舟上別大觀仲漣次汾西韻

高柳鳴蟬翳夕陽江皋秋色動新涼誰知巖下維舟

處斷盡江南送客腸

奉大觀寄子容

寄語南原舊舍人半年相憶髮成銀湘江佇見潛鱗起昨日金雞霈澤新

寄題金寮訪

忠愍

江陵草堂

竹裏漁家板作扉草深江路露翻衣依然記得回舟處十里烟波帶月歸

別盧寮訪

露下青楓葉葉涼海山秋色鴈南翔郵亭對月無眠夜應把吾詩憶故鄉

李書狀志賤不入錢席直向碧蹄口號一絕戲之

橋頭供帳為誰開惆悵杯盤落莫回到處行臺如許過也應明日抵登萊

送鄭德基維城出宰順天

天官滋味食言肥玉署烹茶冷逼幃拋却世間榮辱事江南春日舞斑衣天官食言肥乃俗諺也

挽順陽君

東門烟樹綠層層一帶清川繞穆陵此是王孫新卜地獵村漁社十年燈

平生豪氣酒人乎樓下調鷹檝上駒悵悵山丘今寂寞夕陽村笛一聲孤

喬山風雪進香回走馬尋君臘酒開他日蘭亭修契會自憐生客為誰來

題監察契軸

星漏參差九陌清暗中孤唱殿中行霜臺樂事渾非舊冷落屏間記姓名

次吳肅羽贈松葦韻

真訣無因學鍊形病脾端合煮參苓年年喚起天坡興滿握香蔬當海腥天坡吳公號

直廬口號送權三陟

潛

竹西西望碧雲鬟萬點頭陀太白山梅月石川皆有  
作莫教埋沒在塵間

騎省直廬戲贈李知申子異

聖求

清夜沉沉玉漏催直廬殘燭照深杯兵官醉盡銀臺  
酒都令明朝白面迴

知申例稱  
都令公

守夢鄭先生

詳

故第與羅夢賚

萬甲

飲賦得春

字

守夢鄭  
公曄號

二十年前鼓篋人升堂此夕倍傷神梨花落盡菜花  
發庭院寥寥猶是春

交州歌十絕別洪淮陽

靈

水聲嗚咽路高低山木沉沉蜀魄啼此是行人飲馬  
處松牌三尺麥灘西

四面青山劍戟如木皮為屋夾江居灘頭火照聞人  
語報道官童夜刺魚

新安細路入長安駕石橫槎渡幾灘行到水窮山折  
處玉屏千疊半天看

靈源洞裏百花開地獄門深鎖碧苔城郭遺墟尋古  
事新羅王子避兵來

松蘿危棧倚枯藤顯佛庵空不見僧山外花飛紅片



片山中雪積白層層

東西庵子後前龕大小香爐上下潭四月冷風吹雨

過鶴巢如髮落毳毳

石梁銅柱兩爭高三面憑虛鐵索牢夜半僧厨殘火

在洞仙飛去閃青毛

摩訶深鎖穴望西斷石仍傳現相迷玉輦東巡如昨

日草名猶記鳳曾棲

梅檀環擁衆香城靈境潜通白玉京七寶樓臺攀不

得月明仙樂半天聲

萬二千峯看歷歷百三十寺夢依依堅師佳句古人

遍祥老草書今世稀

姜公獻酒席口號

半生耽酒酒為年枉被旁人喚謫仙酒肆逢君終日

飲滿城風雨落花天

和谿谷大學士喜畸翁魁製陞秩之作

御史臺前低皂帽舍人閣裏寫烏絲青錢萬選萬中

日白玉雙輝雙髻時

三策江都早擅雄一官臺署已成翁新詩欲奪陽春

色殊渥能回造化工

直廬口號

苑樹鴉啼日欲殘直廬風雨送微寒春心只在催花柳多事詩人作意看

書任禮山振扇面為別

火雲千樹柿園紅秋晚陂塘擺種風試問鄉中諸父老柳堤村落昔年同

題德原君草堂

赤葉黃花溪上村茅簷白日照芳樽一枰棋罷客歸去萬壑千峯還掩門

自維楊還又題德原君草堂

綠簑風雨過前溪十里平沙信馬蹄晚向君家春酒

熟小榭初發竹籬西

早發向洛口占離合體

雨歇田家小麥青清晨結束過前垌城東此去無多路洛水寒聲馬首聽

昨自水洛還倦卧閉門中興信上人來求詩書

贈軸上

秋日題詩水洛山白雲紅樹畫圖間明宵更踏中興月笑殺閑人亦未閑

鷺梁別子容醉書君奭扇面

十里平沙細雨收夕陽離思滿孤舟故人今夜過江

宿客裏題詩何處秋

別定州崔使君大容

崔自松都經歷移授定州昨始肅謝明欲辭朝云

人人皆避定州城六七年間五送迎分司學士髮如

雪昨日還朝明日行

謝鄭元帥忠信寄惠仙丹

千疊山中鍊丹處禪房十日不開門還嫌上界白雲

裏却有劉安鷄犬喧

駐節清江白日閑道書千帙閉門看應憐居士偏多

病欲試仙家九轉丹

土爐殘火曉猶溫床下新醪不滿樽烹飲一杯行藥

力坐看初日照南軒

別沈書狀之溟

船頭爭唱掛帆歌雙島三山一瞥過中國聖人恩似

海海無盜賊海無波

寄楊使君道一萬古

四月棠花處處開寺門歸路入青苔風流太守驚人

句落鴈峯頭謝曉來

春日偶題

輕陰不散杏催花江水初生荻吐芽想得田家寒食

近麥田春雨滿三巴

東湖或稱三巴

別江界柳都護汝恪

塞草蕭蕭塞日黃  
塞城秋色似西涼  
孤臣夜夜危樓望  
不是行人戀故鄉

永安第口號

秦樓高出白雲端  
冰簟銀床六月寒  
斜日晚風和雨過  
滿城烟樹畫中看

舟行向忠州寄別暗翁

四月桃花漲峽流  
藥壚碁局共扁舟  
今宵逗帆盆津雨  
回望城西一倍愁

別夢賚還畿庄

草草行裝雨滿船  
還家催種木花田  
閑居熟讀文公

集不復留心奏疏篇夢賚纒以抗章忤旨罷官

過金晦汝光炫青楓溪舊居

關山消息鴈來遲  
門巷依然客到時  
忽見孤雲西北去  
此心那得報君知晦汝方謫三水

送君無語只銷魂  
衣袖如今有淚痕  
昨過青楓溪上路  
雪中松柏滿孤村

別瀋陽通信使

冠蓋翩翩向北庭  
廟堂深計為生靈  
秦關且喜青牛過  
楚屋無忘白馬刑

遼陽西望淚沾衣  
城郭居民已盡非  
不識千年華表鶴  
至今依舊向人飛

癸酉九月寓直銀臺聞曉鶯忽憶月城朴令尹

詞丈在臺時早朝之作謾書一絕宅日見  
歸使寄之

青鎖詞臣聽曉鶯  
當時秀句滿承明  
如今海上逢秋色  
鴻鴈聲中一倍情

秋日東郊雜詠

城頭烏鵲噪清晨  
夾路青松白露新  
誰向神祠遙下馬  
世間多少苦心人

織蘆為屋板為門  
禾滿前畦粟滿園  
自是山中籬落

少沈家村對李家村

湖陰亭子祭壇東  
隱映青林似梵宮  
看取世間傾奪事  
主人三易百年中

箭郊秋水白於沙  
壘石為城十里遮  
城下豆田如席大  
可能收穫助貧家

忘憂嶺外路漫漫  
駐馬玉山十里灘  
箭野官田秋後碧  
廣陵漁火夜深看

天拆江門八字橫  
朝霞初落錦紋生  
漁村恰在微茫裏  
風外時聞過櫓聲

水清沙白草萋萋江上青山是月溪始信田家經界  
正一般林木辨東西

聽說溪居穀雨時銀鱗躍水水平籬村村社酒人人  
醉夾路花枝映柳枝

秋來幽興滿山居拾栗家園一石餘軟飯交炊青赤  
豆新羹同煮巨纖魚

霜落風高罽栗時赤丸如雨錦離離山翁手拾家園  
裏右袖空空左袖垂

王灘口號示汾西諸公

問舍求田計亦疎十年歧路謾踟躕何知宋玉臨江

宅偶作詞臣並世居

壬申十月念夜會飲藥稷書贈主人

十字街頭販藥樓小爐殘燭下簾鈎知君欲效韓康  
伯不用辛勤夜執籌

別端川李使君

燈下題詩坐寂寥藥爐茶鼎過寒宵何當共獵天山  
雪醉擁孤裘看落鵑

夜過士致醉還解嘲

曉月冰壺解渴時先生風味政相宜人間謫下東方  
朔醉後何妨殿上遺

夜過樂全酬見贈韻

夜靜秦樓刻漏微滿林晴雪落霏霏無端喚起風流  
夢睡鴨香消月半扉  
銀漢初回玉斗斜曲房燈燭笑聲譁捧甌春筍寒多  
少莫遣佳人勸客茶

別崔督郵

槐花春水漲龍門玉尺銀梭處處翻自是琴高曾點  
額不勞初化北溟鯤

別江都留後尹仲素履之

催花一雨細如絲宿酒普騰午睡宜忽報故人江海

去別懷寥落寫新詩

寄奉清陰自忠州舟行過石室時

孤村隱映樹陰間寶帶山連石室山謾說經年勞夢  
想舟行咫尺亦空還

附次韻

清江歸棹水雲間江上虛亭鎖碧山聞說忽忽不  
繫纜興來他夜雪中還清陰

別冬至使

濕雲殘雨暗河橋橋上清樽擁使軺借問歸期在何  
日春風吹轉北辰杓

鄭元帥忠信南還田舍將行遺我一小爐妙製  
也賦一絕謝之

百鍊精金製造竒酒村茶戶捻相宜從知雪水陶家  
興不及蓬窓獨酌時

午坐山杏亭中興僧能信叩門戲書軸上

火雲長日汗如漿僧卷題詩憶上方山映樓中高枕  
睡不關人世有炎涼

次畸翁韻別鄭元帥南歸

麟閣圖形正黑頭中興勲業動青丘無端十二金城  
略辦得田間恣意遊

再酬清陰見寄韻

清時養疾卧田間一日除書下碧山只為重輕殊外  
內九重宣室待君還時清陰新  
除北伯

鷺江舟中口號書畸翁扇

江雨霏霏江草寒江頭駐馬別離難年來病肺同衰  
謝懷抱無因借酒寬  
病來離思倍無聊一夜秋風兩鬢凋從此閉門深巷  
裡酒壚碁局捻寥寥  
細雨孤篷酒一樽留君不住黯消魂今宵五馬宿何  
處烟樹蒼蒼江外村



次樂全觀海韻別驪牧韓亨甫會一

年來羸病廢吟詩攤飯終朝睡味宜自是秋懷易憊  
慄更堪江上送君時

龍穴探珠箇箇驪侍郎都尉各能詩自憐病後才全  
退強賦新篇當別危

山灘一曲有幽棲雨後晴波與岸齊君向此間應繫  
纜滿江離思寄新題

灘名四十峽西東一棹飄然上下通記得江村沽酒  
處荻花叢裏喚漁翁

青簾白舫沂江門甓寺鐘聲隔岸聞暇日樓臺尋舊

蹟圃翁佳句牧翁文

茗嘗清遊更未能夢中山水憶吳興何當共酌蓬窓  
雨夾岸丹楓下廣陵

寄題養真堂

白石清沙作四隣門前咫尺廣陵津漁村酒熟黃花  
節更向灘頭喚主人

別寧海池使君

秋日新乘葉縣鳧清霜纔詠栢臺烏南歸莫說傳書  
遠碧海洲邊有馮奴

挽李察訪必壽

曲江春日看花回共許凌雲作賦才消渴馬卿終寂  
寞百年交義不勝哀

西郊送肅羽題扇為別

秋日依依下石碕青楓葉赤鴈回時今宵駐節碧蹄  
館和我臨分相贈詩

小橋流水向灣碕雲冷風淒欲雨時此是昔年相送  
處只今猶記扇頭詩

遊水洛山

朝日寒鴉坐赤楓隔溪人語水聲中前宵借宿巖頭  
寺雙袖猶含萬壑風

中興輝上人軸次五峯韻

經卷詩函半在亡秋陰空鎖舊禪房沙彌報道丹楓  
晚怪殺山中霜信忙

纂局夜飲與汝固子時德餘分韻作樂全亦來

會德餘鄭公  
百昌字

一壺新釀莫留殘風露淒淒夜色寒十字街頭扶醉  
散滿城烟月夢中看

銀臺夜直簡寄子容

石室紬書逢白簡銀臺起草擁青綾何當更作彈棊  
會共對城西雨夜燈

別利仁沈督郵

門巷依依落景斜一壺來訪故人家  
花前把酒還招  
悵明日相思驛路賒

諧體二絕謝李使君

志定 惠益及鯨鬚

工部休誇掣碧海翰林無賴破滄溟  
爭如太守倚天  
劍俯擊風濤千里腥

熬白曾添木公賦撒空誰擬謝兒詩  
商家梅鼎且調  
矣吳地尊羹須下之

記夢

江都喪亂後作

此身如寄尚人間以夢為家夜夜還  
覺後茫茫天地

澗更從何處覓容顏

呼韻口占

小園新綠恰藏鶯山鳥聲和水鳥聲  
靜聽鄰人農圃  
語今春九十日長晴

口號

是夜乃鄰相發引

星月離離午鼓鳴曉風吹送薤歌聲  
沙堤列炬知多  
少不是朝天舊路行

贈覺上人

雄師瓶錫已西遊誰復禪家第一流  
遙想石南庵下  
路白雲還似去年秋

病中別李士謙 行進之任務安

可惜明光起草姿功名誰使十年遲  
艤舫一葉鳴金鼓却是先生得意時

八月十五夜

病人無睡夜聞琴窗外秋霜幾寸深  
一曲未終先下淚世間何限不平心

舍弟晉陽別言

玄元皇帝是吾宗柯葉千年布海東  
珪組軒裳名世業詩書禮樂大家風

文康勲業 世宗朝一歲三魁萬口謠  
丙子年間松

竹咏堂堂節義日星昭

先人經術佐 先王天眷常依日月光  
聖祖神孫傳一德暮年名位冠巖廊

天下詞傳名海內 思綸字字貴泉途  
終天萬古斯文痛不但人間泣血孤

承家末學愧銀根早竊虛名荷 國恩豈有兒孫俱  
趾美也能通籍入金門

卯君詞藻艷天葩映座清標玉絕瑕  
不似乃兄空老大鬢毛如雪眼生花

門闌盛事昔年歡王謝風流世共看  
父母弟兄妻子

樂不知人世有艱難

君家酒熟我呼賓我苑花開君吐茵鎮日東西陪杖屨夜深門外有朱輪

昔謂斯何今謂何先陰一世轉頭過誰憐泉客啼成血却有波臣淚是河

天翻地裂在須臾國破家亡古有無弟妹飄零兒遠謫半年南海一身孤

暮春滄海獨行時風雨完山再會期南去北歸雙涕淚此生無處不相離

三年奔走萬山中君向西時我向東自是神明不竟

酷未應天地盡途窮

草心何路答春陽天地悠悠歲月忙不信含靈殊木石至今猶有未灰腸

蕭條人代自生哀故里重尋但草萊不識當時華表鶴也能同着鴈行回

誰教土木復簪纓重入脩門似隔生我自識君君識我更無同列舊知名

西省南曹兩侍郎倦驂單僕共趨蹌極知乘鴈同來往素食空慙耗太倉

君因火恐未安居幸有先人舊爨廬骨肉團圓差足

慰暮年身計欲何如

天恩新許謫臣回一妹聯居鎮日來擬與兒曹消晚景間從都尉討深杯

化翁何意妬偏多心欲諧時事有魔洛下幸纔經歲月晉陽今又隔山河

晉陽今又隔山河臨別相看奈老何爾自不來吾未去一年應似十年多

晉陽形勝有高樓百尺城臨萬丈流不淺元規清夜興可堪西北望神州

晉陽城外野茫茫蔓草寒烟古戰場義士忠臣遺憤

在試依牛斗覓龍光

處處黃橙間白梅竹林寒日鷓鴣來落南人士多親舊新釀誰家待爾開

魚鹽南海在門庭官筍村薑可壓腥何似嘉陵烟雨裡剪葵炊粟釣沙汀

天恩早晚許三刀未必瓊雷隔海遙方丈東西無不可驛樓秋月寺燈窗

會節雙溪亦一奇倘來佳興只心知書生薄相兼衰病人欲天從未敢期

不然吾計有歸歟十二灘頭結小廬我圃君田同一

壑待君耕種待君鋤

天時人事日悠悠中夜無眠涕自流國計身謀俱未  
定可堪孤露遠離憂

平生未作別經年垂老誰知悵各天去住商量無一  
可莫如徑賦式微篇

江南秋草碧紛紛獨有文無可贈君蜀魄三聲能解  
意不堪聞處也堪聞

銀臺口號

監鑰知時報閉門直廬風雨已黃昏詞臣謾有文園  
病敢望宮醪出上尊

直廬寒食

春來羸病倦題詩滿眼韶華撻不知風雨一番寒食  
節小桃開遍向南枝

回文

紅旆映日落霞殘碧柳含烟晚影寒風轉語鶯新破  
夢空堦玉漏晝珊珊

白洲集卷之三

白洲集卷之三

三十一



